



遺民詩卷第三

寶香山人 卓爾堪 子任選輯

閻爾梅

用卿古古江南沛縣人
白奪山人稿

俠士行

丈夫感意氣不在贈黃金顏色稍輕薄千金猶
痛心

豪華非所難所難獨知己不為五侯生甘為布
衣死

採蓮曲

倩郎整雙釵採蓮墜一枝釵墜何足惜恐使郎



心疑

懷古

黃河來萬里滄海去朝宗經過溪泉處諸水俱
率從與時爲盛衰喜怒看天風行人不敢渡舟
子心忡忡沙渚聞笑言烟雨垂釣翁神禹知有
命蜿蜒視蛟龍

出都門往遊西山

岸高徑低沙塵聚亂風刺面如昏雨獸碑雜列
朱櫺間五侯墳沼藏花樹自晨至午人肩摩午
後遊人無覓處村落旣稀烟火寂古寺破垣僧

散去遠峰變色暗夕陽盜賊持兵走荒墓虎豺
乘野亂奔林當道作威聲震怒鞭馬馬老委中
途頑石滑蹄束其步二僕携書隨行緩相隔一
里不相顧遙瞻斜嶺通白楊草根狼藉拖山路
陟巔迴視來路封滿天明月收野霧

牧童曲

沙田種楊柳溪灣注秋水深村徑僻多烟蘿行
人錯走蘆塘裏橋東酒家酒壺香農夫辛苦何
曾嘗牧童摘瓜醉籬旁一路山歌驅牛去飯牛
已肥醉不妨

漁父辭

一水涵千峰水平峰影微漁家坐孤村遙望天
四圍白日見鷗鷺夜見螢火飛螢火飛來燒人
衣問君白日何所歸峒山居者咲行者我自乘
船君騎馬騎馬長途倦殺人何如采得西風蘋
生

中秋夜作

時同梁東川馬龍賓魏君重黃若曾吳燦

惟秋為氣苦相感輒成悲況處異鄉外又當多
難時浮雲終自霽明月不吾欺移酌空階下長
歌古別離

贈孟依之

好音無識者工瑟不如竽豈有渥中駿甘為轅
下駒寒星窺寶劍明月洗華珠試作移山解愚
公未必愚

膽廬贈馬果人叔侄兼示布菴茆史子
遠愿士

城市無餘地亭臺曲折生天於冬夜永月以歲
寒明花鳥求新侶圖書載舊評此中須靜享不
與世人爭

游太平菴

在三峰山北麓

探竒投僻路一往不知勞險若無人住荒村有

遺民詩三
三
虎嘯石田收秬黍山稼剥胡桃拄杖東籬看千竿鳳尾高

宿白厓寺

寺在少華山下

碎磯填鳥道環水帶螺紋嵐結千村雨松垂一樹雲圭驪峰暗護河渭影遙分歸鴈時時唳無人共我聞

別峪泉無數懸厓屋幾間經年為客役此夕覺僧閒潭冷魚穿石風腥虎過山飯餘猶未暮早已閉松關

箭括

今名千尺幢華山極險

險光開一綫窄縫夾青天躡磴先妨膝扳厓側用肩木梯撞外補鐵縑井中懸怪石橫如竇陰風直上穿

游泉林

泗水源也山名陪尾在古卜縣東五里

闕里秋光曉東行訪卜橋水躔丹幃尾山帶白雲腰佳卉紛如繡靈禽靜不囂石邊堪枕漱況復酒人招

村居

十五首選一

邠管曾浮海巢絲不買山勞心天地苦寡慾性情閒南伐標銅柱西征想玉關豈如高尚者詩

酒坐花間

題萬年少隰西草堂

素壁承兼瓦朱欄紐石藤求羊三徑客詩酒六
朝僧澤闕難窺岬山遙不辨層旅堂春綠曉餅
食看魚罾

秋水堂前路塵封晝不開撫弦絕真賞聞笛有
餘哀花落樊桐館雲收戲馬臺黃泉無驛使誰
說故人來

廬郡夏秋詩為龔共孝升作

三十首選一

花間防菊虎池上伏魚鷹泥少羞填海山高誤

倚冰市多充隱客朝有噉名僧未若松風外狂
吟對一燈

村居雜咏

十九首選一

意氣能階禍江湖最忌名美人愁國色君子慎
鄉評好爵崇三事明珠積百城蓋棺攜不去何
用苦經營

清明答單臣素臣韓淑旅兼寄故鄉友

人

趺坐如禪寂安知節候更偶因贈楊柳纔悟是
清明宿草青連海春山綠繞城遙憐桐竹發多

少故人情

慰同難魏君重黃若會二子

秦客寶秦鏡楚人珍楚弓上天應悔禍君子勿
貪功雷首行歌倦蘇門對嘯空莫傷時與數吾
亦固吾窮

歌風臺

上得歌臺風滿天如聞筑擊十三絃還鄉高會
山河動開國元音劄守全重過屠門頒鐵券親
呼酒媪賜金錢西京樂府從茲始俯仰情深妙
不傳

碭峰雲澤七峰藏泗水波澄發怪光屋上龍交
生漢祖山中蛇斬應秦皇英雄原不羞貧賤歌
舞何曾損帝王認取當年悲樂地蛩吟鳥語盡
宮商

泗水亭陰列漢官營連桑梓共盤桓屠沽拜將
親朋賀子弟封侯父老歡駐蹕不勞綿葛禮圍
罇仍著竹皮冠軍多汲盡琉璃井無數繩痕泐
石幹

荒臺徑可作離宮妙選良家百二童擊節三聲
風響變停鑿十日酒壚空追談壯士訶龍媪漫

遺民詩三 六
對羣臣謔狗功雖與項王同泣下還將成敗決
英雄

淮南振旅過香城衣繡云何肯夜行驅策羣雄
三傑冠摧縱大敵五年平直開關內星辰氣不
諱山東酒色名嫚罵亦看何等客腐儒原自使
人輕

威加海內不言尊天子王侯醉里門昔假萬錢
爭上座今提三尺定中原飛揚自寫真人勢忼
慷能招猛士魂莫與汾陰辭並奏秋風衰颯不
堪論

汧冑草堂讀史詩

後漢書有扶風馬瑤隱汧山以免冑為事
學者稱馬牧先生余心好其人取以名堂

平沙疎樹曉矐矐披剪荆茅植桂桐郭泰辭徵
虛有道田疇抗節隱無終稽遲婚嫁愁經費顧
惜行藏恥送窮更考逸民刪作伴不須牛僧辱
牆東

炎天節序似秋冬果蒂先凋落葉重黃水半沉
官道柳白雲環鎖墓堂松江東王氣留司馬海
外神仙戲祖龍經戶無人聞見寡西林孤寺一
聲鐘

遺民言三
七
長夏烟村罨翠微良苗雨後湛新暉釐功須使
求田少遠害無妨結客稀東渚白蓮迎錫杖南
園黃鳥炫金衣仙溪路杳難重問流出桃花隔
岸飛

潦注經旬苦未休嘉田濩落不成秋烟霞結侶
青鞵綻草莽稱臣白帽羞里社雲間歌兔首湖
村霜老薦雞頭行將決意佳山水何得宗生僅
卧遊

青山無價不須錢別業城西有薄田
轅騎長鳴思塞下
鞬鷹疾視出天邊
三秋好雨來何暮萬

里中華去幾年絕幕犁庭非昔地盧溝橋側是
居延

東村一夕雨平塘風露歲蕤黍稻香魯鼓幾時
驅海鳥弧星昨夜走天狼花間鐘出雙林寺田
上人過獨木梁懷古情深時有詠停雲何必減
柴桑

斗室蹒跚抱膝吟空堦露洗不弦琴歸雲度嶺
千峰走宿霧籠村四野沈吳苑美人歌白苧漢
廷廉吏作黃金誰能留得繁華住一夕枯霜葉
滿林

雨沐秋空月色嚴山河影入桂花奩良農帶索
晨干耜貧士挑燈夜織簾醉酒光如金掌露陰
詩味似水晶鹽悟來生死俱遊戲何用旁尋季
主占

百本梨桃水一灣茅茨新構兩三間舊家王謝
偏懷土多事巢由更買山孤卧始聞棲鳥亂野
居惟有種花閒西風蕭瑟無春夏鬢髮勞人夜
夜斑

閒閒持斧白雲阿棋未曾終已爛柯老去行吟
枯樹賦悲來起舞大風歌長門日暮佳人遠空

谷年深捷徑多豈不能辭貧賤客蹙然無奈足
音何

桑田空處是蒹葭隔斷垂楊一徑斜架上春培
山藥豆牆陰秋種海棠花逋臣解劍酬漁父處
士揮錢付酒家讀史心傷鼃錯傳纔知文帝惜
長沙

答龔孝升

卧病霜巖枕藥簾羸嶢嶢歸路幾時平但期苟活
姑長往雖處窮途敢倒行夜靜江楓聞歎息秋
深山鬼瞰高明桃花滿岬無人到漁父初來笛

一聲

萬死餘生守敝簾
母將休咎質君平
家移橘子枰中住
人在梅花市裏行
別有衣冠非近見
疑傳蹤迹故難明
天高鴈度留空響
遲和階前落葉聲

春日寄懷王似鶴

朱絃縹緲憶雍丘
送我西南放步遊
山海有圖非志怪
離騷無處不悲秋
春風灞上祠文帝
臘月隆中弔武侯
常愛故人詩畫好
歸函烟雨寄滄洲

鬚眉嶽嶽古沙門
持鉢緣江采蕙蓀
魚服是龍誰肯信
犢衣多蝨不堪捫
光含合浦珠
逃景血漬荆山玉
有痕底事回瞻青
草路東樓昔者亦王孫

觀虎丘祭厲壇者

初冬黑時具衣裳
告朔喧闐傀儡場
短簿簪花儼厲鬼
生公舉箸飯真孃
汗尊仍用先朝製
血食分霑故土香
盼蠻豐融人吏散
蕭蕭紅葉委山塘

戊申人日

繁華速老是春天花極穠時落更先遯野有情
看拾翠封侯無相寫凌烟心悲晚景歌皆痛士
遇竒才恨亦憐我去君留仍暫事成功者退記
他年

戊申禊日詩

將南去龔孝升出錢
同席皆吳越諸公

畚鍤平治紫陌新雨師先為我清塵漁樵各有
傷心事天地常如中酒人大野蒼涼朱鴈度高
山巖業白雲鄰淮南席主江南客點綴離亭處
處春

城外城中兩色天山光籠絡上林先橋邊雲幕

千棚酒馬上風箏一綫烟花粉徒為蜂蝶戲
除安得鬼神憐雙松老矣吾佳友始自崇禎第
一年

遊古代城望上谷雲中諸山

參合陂南接太行三關繚遶氣蒼涼漢家初建
文皇帝魏國先封代郡王作曠池深雷欲躍磨
笄峰冷血猶香武靈開創邊城遠當闕陰山一
路牆

東城懷古

史稱晉王李克用會阿保機於雲中之東
限城在桑乾河北岸大同府南六十里

晉王遼主會雲中遺迹沙南石井東在昔戰場

成遇禮於今兵氣滿寒空地高天近星辰大春
少秋多草木窮白豹黃狼隨處獵桑乾疊浪鼓
西風

大同覽勝

呦堞嚴關戍角叢秦過萬里扼當中空山石馬
初皇隧古刹金鴟道武宮墩絕烽烟無主似田
多稂莠不毛同今年旅舍秋分蚤赤塞黃雲鴈
滿空

登七峰

大同西南
四十五里

高峰南首祕精靈微罅通幽日影冥風入山皮

吹綠簡雲穿石腹結黃庭搜神于寶重添記博
物桑欽別著經獨立千尋憑檻看灑川如縷鴈
門青

元夜題少林方丈

元宵何處好春燈柑酒懷人睡未能樹裏月光
纔漏影山間雲氣不分層北朝金布無雙寺東
土花開第一僧鐘板沈沈方丈閉毘盧閣下積
寒冰

嵩嶽廟有感

層層金碧想繁華廟貌山光盡數差松栢失時

先落葉鬼神遭亂悉無家殘宮草際埋鴟吻廢
閣堦前置兔罝何處道人稱鍊術請從灰礫認
丹砂

西華橋風雪甚大主人出酒相留作此
志之

古來文獻老中州義墓康陵次第遊負販僧人
堪將相輟耕傭者笑王侯疲驢碎走冰前路凍
鳥低飛雪上樓橋畔適逢魚酒社不須輕典鷓
鷦裘

函谷關

隘谷斜登勢到天車無方軌騎單牽千尋青壁
身旁夾萬里黃河足下漩范叔西來人不識田
文東出吏猶眠長途雖倦還周覽石姥山飛百
尺泉

錦室當年百寶陳遭逢離亂不成春爾來何遠
思名將我見猶憐痛美人白鳳亭墟玄草散青
羊宮燬道經塵登高西望邛峽近轉眼銅山賞
弄臣

題劍閣

亦曰劍門關

巉崖橫障井南天萬仞無堦一罅穿徧地頭顱

遺民詩三
生鬼火空村瓦礫絕人烟峰攢劍刃干將鑄壁
鑿星文閣道懸形勝異常銜壁去庸才劉禪動
誰憐

登峨眉山

中峰橋下束雙谿鬪浪衝沙震鼓輦脊墜風搖
攀鐵索頤厓石陷蹋藤梯憑虛似覺千山伏到
頂全無一鳥啼銅瓦殿殘遺墨在建文壬午雪
菴題

題昭烈廟

高皇世祖兩貽謀章武還從未路收自可王孫

承帝統寧容國賊篡神州蠻方擴地曾名益蜀
士談天直姓劉秦宓答吳使張溫事諸葛死忠謀死孝當時
悔不斬譙周

閬中今保寧府

葭嶺雲高梓樹濃閬州城對錦屏峰金牛入棧
銘司馬石燕臨江祀伏龍絕世山川非耳目經
年花鳥不秋冬大秦身毒曾通漢便道峨眉借
一筇

錦屏山

仲冬天氣似花朝巖壑鬚茸翠未凋半截雲沈

峰頂塔兩來船斷雨中橋漁村烏柳圍金橘僧
舍香楠蔭鐵蕉地接蕃駝人習苦荒山紅葉女
郎樵

臨邛至青城山看戲

曾聞蜀國四弦詩可補江南白紵辭村舍笙鏡
喧蠶母江神婚嫁謁冰兒衰年不作題橋夢退
步何須叱馭爲此去洞天尋道伴青城山下搗
蹲鴟

題雲臺峰

山巔山麓異陰晴羣巘參差霧割平落鴈峰頭

雲萬丈飛魚嶺上月三更星潭水響金蕖舞箭
筈風搖鐵鎖驚夷險何常人自取樵夫擔擔走

幢坪箭筈卽
千尺幢

山中荅友人

中原離亂歲云徂日日移家家漸無讀禮空山
人慘澹談兵半夜鬼挪揄郊居習獵分鳧鴈卧
病加餐掘笋蒲鄙薄彈冠非志士花開攜酒宅
東隅

題大上方

意外山房鑿徑非凌空樓閣四無依闌珊鏽鎖

孫輕弄重疊琉璃燈蝠亂飛潭落水慊成瀑布石
漂星渚象支機藏經古塔僧年老猶感神宗賜
紫衣

從臯蘭至抱罕即事

臯蘭山在蘭州城南六里

臯蘭夜月聽鏡歌抱罕鳴濤下笋籬井度八星
躔白峙雍州三面阻黃河田家棹引孩兒水戍
士庭生寡婦莎將略從來西漢勝烏孫督護有
長羅

連雲棧

草涼山驛苦嗟峨千轉凌嶒古渡河日截東西

光剩半天餘前後影無多頑猿接掌垂空飲健
馬停蹄歇喘過怪絕谿峰驚未見畫圖難似奈

君何

此蕭相追淮陰侯處

隘路環遮隔嶺招人呼二十四鞍韉花飛滿澗
秋風響泉注成江夜月潮王氣先隨亭長去山
靈不怪子房燒英雄過後無天險谷口零星處

士瓢

此留侯燒棧處最險

重過兗州有感

亭長臺西舊酒徒疎狂名姓滿江湖常從世外
尋高蹈不避人間有畏途季札重來周樂散奚

斯一去魯宮蕪南樓極目誰同醉正月愁聽是
蟪蛄

七月望日登鎮朔樓

十丈飛甍鎮朔樓樞臣特簡控咽喉經營乃未套
三千里鎖鑰燕雲二百秋火焰山煤燒黍谷海
陀潭水下蘆溝窮邊適值中元夜厲鬼他鄉哭
未休

答陳百史

海外生還九死餘老親未葬故踟躕決無世上
彈冠想徒有年來却聘書伏臘不關新晦朔湖

山還伴舊樵漁侍郎休問田園事先帝宮陵亦
已虛

漫說長安好僦居五雲臺下即穹廬誰無生死
終難避各有行藏兩不如龔勝堅辭新室組臧
洪遲答故人書當時風雨雞鳴約二十年來豈
盡虛

燕趙雜吟

麻衣桃杖出都門燕趙風光細討論上谷膏腴
環督亢中山意氣感壺餐空羣騏驥賢人骨貫
日虹霓刺客魂怪說蚩尤能霧戰塵高涿鹿晝

黃昏

天平山

狡狴峰卓太行陰
呂谷凌空幾萬尋
日被巖遮藏戲鼠
風從頂撲落飛禽
前無路跡青霄閉
下有泉聲白霧沉
直出流沙橫嶺外
漳河如線影

秦嶺

金牙關外列長陁
脊與天交戴井星
橫卧全收斜谷勢
周看別續大荒經
神禾春秀千原紫
鬼草秋華萬壑青
來去地痕都不見
風烟遙隔雨

冥冥

登崆峒山絕頂

在禹州

昔聞軒帝訪崆峒
今我登巔四望窮
紅葉千林中嶽外
黃河一縷太行東
危巖倒結龍鬚檜
絕壁孤懸鶴膝桐
黝黝石梯潭水靜
撲來香鼠貯衣籠

登大名城遠眺

衡漳淇澳滙元城
想見唐時魏博營
宰相有謀銷鎮變
李絳事將軍無筭失牙兵
羅紹威事河分舊跡圖難攷
路扼中原勢必爭
欲見南山何處見大

伍峰秀午雲平

恒山

陰豐天半敞雲扉
綰帶瓷渾繞翠微
滑路偏逢坳石礙
孤峰傑出衆山圍
根趨地外松如走
樓挂厓邊寺欲飛
北望龍城纔咫尺
青青荒塚識明妃

登馬服山

一名紫金山在邯鄲城北十五里有趙奢墓祠

紫金山頂石嶙峋
斑駁巖花襲翠茵
龍洞出雲連鵲穴
狼溝飛水注熊津
虞公豈是三千客
毛遂原非十九人
說士謀臣何所用
邯鄲賈豎早

三秦

重陽與胡天放吳姬望嵩三同賦

天涯一十八重陽
歸到淮陰卽故鄉
元亮采來盈把菊
孟嘉髡去滿頭霜
飛鴻有序成賓禮
戲馬無臺惜戰場
看鶴尋花聊自適
登高何必佩萸囊

杏埴莊雜詠

星海滄江萬里游
歸來更上採蓮舟
青門瓜叟無名姓
忌諱人前說故侯

劉君固攜琴見訪
醉後贈之

蕤賓鐵響應黃鸝
紈扇輕搖唱竹枝
新曲向人翻舊譜
野棠花下有紅兒

廬州見傳奇有史閣部勤王一闋感而志之

元戎親帥五諸侯
不肯西征據上游
今夜廬州燈下見
還疑公未死揚州

題張元操別業 時同完白

一蹇千峰亂蹋開
峩嵒瓦屋漫疑猜
猜憎嶮不比連雲棧
隨着神燈問路來

題余闕祠

闕元之淮西宣慰使為陳友諒所攻血戰自刎追謚忠宣祠在安慶城東

樓船疾下水禽飛
花浪渦漩太子磯
死守七年經百戰
孤軍終不樹降旗

蕪湖弔黃將軍

朦朧百隊鎖征雲
帥纛風摧日色曛
磯底靈螭吞戰血
每逢陰雨哭將軍

游莫愁湖

欲採芙蓉近晚秋
微醺斜倚望江樓
人生都向愁中老
誰解閒行問莫愁

宿州

徐南風景最蒼涼
宿子城邊草更荒
偏是我來

新雨後山花村酒一齊香

贈蔣馭鹿

晉陵蔣馭鹿為鎮國公所知公歿後馭鹿念之不置余悲其意而咏之

鐵嶺金臺夢一場朱門碧草影茫茫西風吹散梁園客獨有枚臯哭孝王

陶靖節墓

廬山西麓老松楸處士星高此一丘碑碣當頭題晉字其餘何事不千秋

登大梁鐵塔懷信陵君

鐵塔雲浮十二層爨山衰草結嚴冰英雄無過高皇帝特過陳留祀信陵

李

顥

中孚陝西盤屋人

卓烈婦

有序

乙酉夏四月圍揚州城將陷前廣寧衛指揮卓煥元配錢氏泣謂煥曰城必陷矣陷必俘孰若先死死當與稚子俱夫子無累當易脫耳遂抱三歲子躍入後園池中煥有長姑適王氏者今孝廉王應詔母也少寡歸母家泣

遺民詩三
三
曰侄婦有夫且死吾未亡人復何待
亦躍入煥未字之妹二則又躍入煥
幼弟三不見嫂與姊覓之池畔見溺
于池中則又皆躍入池水為溢錢死
之時年二十四適煥七年煥長姑年
四十長妹年十六次妹年十五一門
相率從死皆錢為之倡也感而賦之
乙酉圍揚州城門一月閉丁壯死城頭老弱哭
街市烈婦語其夫請君從此逝不見高傑兵殺
掠無巨細況茲雄師來後先皆鐵騎憶昔結髮

時雙雙坐羅綺池上兩鴛鴦見之嬌不起如今
張羅網反覆迷天地雄飛雌必隨雌在雄反累
所有週歲兒地下為君乳城角一聲裂城內兵
四至遣夫前出門驅家後園避白髮夫長姑黃
口夫諸弟小姑兩齊肩掌珠抱者是共妻為八
人所去唯夫婿妾身不可污兵刃一何利長幼
聚一堂緩急權大義夫婿園中池夫婿池中水
池中自有天藏我蛾眉麗一躍婦與兒再躍長
姑繼三躍雙小姑四躍靡遺類生願相從生死
願相從死清波激其上明月枕其底不聞門外

兵殺人如屠豕

李

栢

雪木陝西盤屋人

卓烈婦

前指揮卓煥妻

江南昔喪亂天地皆慘蹙殺氣連朝昏轉瞬損
骨肉哀哉蕪城陰死者紛相續蒼頭化蟲沙綠
鬢半俘戮偉矣錢宜人大義性所屬燭事在幾
先寧使臨期促孤城累卵危堂奧豈堅築從容
告夫子潔身固宜速襁褓且與俱恐以累顧復
決志無旁撓片言剖榮辱躍水如凌波母子先
淪覆遶池哭失聲從者繼以六長幼同一宗赴

死等赴沐愁雲起方塘連袂登仙籙褒德垂芳
徽忠貞原世篤千秋正氣存而乃備巾幗吁嗟
烈婦篇掩卷難終讀

魏

禧

叔子冰叔江西寧都人

擬鍾建新婚詩

有序

楚昭王奔鄖鍾建負季芊以走既定
將嫁之季芊曰所以為女子遠丈夫
也鍾建負我矣遂妻之

讒人食國封豕外訐荒荒夢澤載寢我王有鷁
斯雛將飛其旁由于背戈我乃負行天意所知

下臣何望惟君貞一媯汭以降玉珮陸離華鐙
皇皇親我容輝中心悽愴千秋萬歲以報君王

季芊荅詩

在幼章華實惟師保天意降詔乃在夢道王出
取我子以襁褓肘足既接有覲禮守念子忠敬
願言灑埽華鐙宛宛垂帶離離千秋萬歲與子
無違

葉烈婦誄

烈婦姓謝氏為邑士葉羊妻

婦既烈止義從如水人智也生婦智也死

秋蟲五章

有序

甲乙之交大變三及予三言之已卧
聽秋蟲慨然有賦

萬物欲秋有蟲啾啾或鳴在原曰秋曰秋人曰
無然

或鳴在原祇不爾聽或鳴在巔帝不爾信帝曰
眇爾蟲無知不念下民之無衣

我行四野秋風索索或吹其南或吹其北
曰謀諸市欲以貿絲曰謀諸婦維此杼機維此

杼機則已後時

維秋徂矣維冬居矣雩雩雨雪則載途矣民曰

祈寒逝剥膚矣蟲則殂矣帝曰吁矣

詠史詩和李咸齋

自古大聖人身皆建奇蹟各各不雷同名與天地立曹瞞營四方郭李非所匹挈器還漢家伊周遜其德惜哉李天下不從老奴策

隱當為太公不當為伯夷擇地釣渭水乃為西伯師德公處襄陽諸葛僑隆中既當都會地亦多豪傑從但使處孤僻時務安得通

走筆寄甘健齋轉呈張曲江明甫

甘子壁上詩慨然想見君有奇甘子避世東牆

下君數顧之何所為其日示我一長篇上傳山

西巡撫忠襄蔡公賢

公諱懋德號雲怡南直崑山人甲申死聞賊之難

後有論

贊三百言睢陽之烈千古傳

公貽周遇吉書有此睢陽之烈語

張君

傳如韓退之附載中軍應都司

應名時盛

凜凜南八

好男兒方伯名與許遠齊

趙方伯諱建極罵賊不屈凌遲死

更有寧

武周將軍闔門戰死無子遺感公貽書自憤發

愧死賀蘭不出師

周名遇吉與妻俱蒙古人城破手刃巨賊百十人身中數十鎗死其妻率家僮僅百

人焚舍巷戰迄死無一降者

是時蔡公奉旨已解任力戰十日城

破自經三立祠勞瘠身輕不得死時盛乃脫鐵

甲加公衣歸家手殺子與妻再拜屍前經樹枝

門阜廝養二十餘祠前樹下屍纍纍我同林子
讀至是默然無聲淚兩垂吏部曰公用人侵我
吏臺省曰公儒者不可使國是日非士解體傳
中一一詳其事乃知張君不獨愛忠臣能見大
計有如此我翻案上書明季遺聞多刪除林子
拍案大叫絕何人今能爲此說甘子拱手君莫
疑此亦張君之所爲朝出城西門甘子送我乘
桴行江風颯颯吹白蘋石瀨迴薄濺衣巾悔于
南豐不識君

金精行

有序

逕口田民女張麗英好道年十五面
發竒光常以紈扇爲鏡遂入金精山
長沙王吳芮征閩粵還經此地聞而
聘焉女使謂芮曰山有石室上通洞
天若能穿之當相見也芮果使兵人
以鐵鑿鑿穿之女方梳髮石上歎曰
吾金星之精降治此山豈與人世事
乎攬髮徘徊作石鼓之歌歌畢紫雲
鬱起遂登天而去

長沙鐵甲屯逕口素帶花旌動楊柳玉驄斜駕

七星車路上行人盡回首麗英家住此村落不
愛鴛鴦愛猿鶴石苔為髮蘿為裳日采松枝煮
丹藥烏飛月落洞門開平明車馬爭入來冉冉
披髮出峰頂三軍悵立百花臺臺上日日雲波
屬臺下年年春草綠風雨夜深山洞冥鐵鑿餘
聲出空谷

早發華陽鎮

七月五日阻北風江頭白浪高於篷中秋夜泊
華陽鎮琵琶琥珀聲琤琤月高雞啼天不曙官
船吹金起擊鼓不聞江上人語聲惟聞滿江動

檣櫓北風漸軟江水平高帆一一出前汀估人
利涉爭及時何能熟寢待天明披衣出艙我看
月波黑天低光明滅夢中每愛放江船月落空
江鳴鷓鴣

揖黃君

高郵城外水連天高郵城下齊泊船城裏有人
持書至船上反側不成眠舟子三更起理楫送
我獨上堤頭立五尺以外皆波瀾僕夫趨月負
我涉蘆中老父起呼豨問汝半夜欲何為逡巡
借得牆外坐冷冷風露沾我衣身寒背倚溼蘆

葦腹饑口嚼乾蓮子西頭之月不肯落東頭之
日不肯起須臾人說開重門短衣垢面揖黃君
勻庭冬夜聞林舟之彈琴
悄然成獨立何處直鳴琴寒月不肯落遠山時
有音松間白露下池上夜泉深曳杖還歸去蕭
蕭風滿林

余有寒溪聞落木之句羅子為作畫復賦
左折西橋路東臯連翠微誰將一幅紙寫余心
所思松下聞聲處溪前獨立時寒光看不盡日
夕秋山知

靈巖雜詠

琴臺如髻繞烟鬟學得新聲手自彈七十二峰

看不盡烟波純浸洞庭山

西施琴臺縱望太湖湖中有七十二峰最勝者東西洞庭山

野草荒臺秋復春至今遺恨浣紗人應知越女

傾吳國不比楊花覆白蘋

後人每以西施太真並稱余謂西施越女有復讐之義與古今

女寵亡人國者不同

李

瀚

士翔籀史江南興化人

雨夜

積雨侵階滿茅堂可浴鷗妻孥十口聚燈燭五
更愁隴麥春苗偃溪田水荇流野人思見日偶

語立沙頭

懷艾山三十弟

英武小橋北龍津闊水東平蕪一以望春思兩
無窮遠樹微烟外孤城細雨中何時天氣好放
棹野花叢

春日雜詠

放目江村迴扁舟曲岸回絲絲牽弱藻隱隱度
輕雷驚筍魚頻擲沾衣雨急催薄醪邀客醉莫
放掌中杯

春夜書懷

村舍獨愁人寒牕坐一燈餘生同短燭世態更
春冰避地思何往低頭愧未能長懷無限恨不
覺淚沾巾

聞放梅上人至普潤菴同靈雨過訪

共訪梅公去行行就水干板橋秋漲沒漁艇夕
陽寬杖笠雲邊淨鬚眉竹下寒主僧不厭客雙
薦紫菱盤

送顧叔向之湖南

七月揚舲去淒淒荆楚游江山仍接漢詞賦且
依劉旅興桃源路鄉心明月樓鴈書衡嶺盡目

斷九疑秋

十五夜立秋對月

暑氣收殘照高樓皓魄生金波圓靜夜銀漢近
前楹露下一庭白天開萬里青愀然念江海幾
處未休兵

光孝寺訪唐佛

傳聞古佛自唐朝與客尋游過板橋一徑莓苔
寒瑟瑟千年燈火坐蕭蕭秦宮寂寞餘殘照晉
苑淒涼賸野蒿何事空王遭浩劫尚留金碧未
全消

秋懷

孤帆六月去悠悠忽報雙魚已暮秋鴈影天長
迷故國月明人醉在江樓芙蓉露冷烏衣巷楊
柳烟橫白鷺洲此地從來多勝蹟莫因舊恨起
新愁

昔曾遊遍廣陵城落絮霏香緩緩行古渡橋頭
吟折柳梅花嶺上聽新鶯誰家小婦拈笙坐吹
徹高樓永夜情回首十年歌舞地可憐絃管只
秋聲

為尋蓮社到南郊普潤菴邊柳萬條攜手吳僧

看落日傷心越地說前朝佳人拾翠游三竺韻
士調絃醉六橋不識錢塘江上水近來添得幾
層潮

傷春曲

池塘春草綠依依萬古愁魂喚不歸羨殺南來
鴻鴈影月明天外一行飛
隔城三里水之涯中有秦人幾百家未許外來
窺渡處至今不肯種桃花

十五夜同艾山弟對月有感

英武橋邊月似銀一天涼洗淨無塵可憐塞北

湘南路誰是憑闌看月人

象山王文扇頭見徐山甫表兄偕有秋
來黃葉滿江頭句用為起韻口占一

絕

秋來黃葉滿江頭萬頃蒼茫泛釣舟夜靜月明
天一色不知何處下魚鈎

廣陵元夕

元夜揚州月正明琵琶絃索盡邊聲何人更唱
陳隋調曲裏猶含故國情
珠箔高垂十二樓玉簫金管間笙篴回看四十

年前事明月春風總是愁

楊

焯

俊三江南吳縣人

秣陵雜詠

城南臨眺處傳是雨花臺野曠層陰合山空積
翠開吳雲連海動朔鴈暗江來坐覺烟霄外風
聲戰角哀

橫塘堪戲馬馳道指牽牛結客過三市鳴鐘動
五侯花翻桃葉渡人醉木蘭舟莫更看秋色風
烟發旅愁

愁心吳苑客短鬢帝城邊二水孤帆外三山落

日前翠屏江障夕碧樹海門烟歲月天涯晚音
書易隔年

正學祠邊路沉吟木末亭雨飛垂薜荔臺古落
丹青夜火歸遊騎寒城沒曉星蒼蒼空霧裏應
見哭青冥

余

懷

澹心無懷福建莆田人
味外軒稿

同石苓登天寧塔

拔地插高標穹蒼接馳驟崔嵬削巽維峻極屹
乾首金莖吐青蓮玉柱迴丹鷲烈風吹石門憑
空怖牕牖傾耳奔雷霆天海相戰鬪瀛壺樹影

懸洪濤擁川后羣山排芙蓉城堞錯如繡依稀
一鈴語似欲驚鼉吼側聞楚禪師一磚誦一咒
非經神力扶莫識坤輿厚我來拾百梯陟巔摘
星斗摩娑龍女珠天花滿襟袖

塔成有龍獻珠
天雨花之瑞也

游天寧觀楚石禪師衣鉢歌

天寧西齋有法寶一衣一鉢傳楚老大幅白氎
領微襞細紋潤製工何巧國初貢自高麗王頒
賜名僧古來少鉢形九寸髹以漆旁着四股相
迴抱穿綴雕環貫以珠復以精銅冒其杪中有
波浪翻枕椰餘地黃金嵌香草二物收藏三百

年江花海月含文藻夏鼎商彝久淪落珠襦玉
匣終難保萬事傷心空野烟對此茫茫色枯槁
山谿鹿過鳴蘿鐘門外松花落如掃

拜于忠肅公墳

今古錢塘割昏曉江潮怒噬英雄老松柏森森
北斗低忠臣塚上無啼鳥隔湖月照鄂王墳淚
灑兩朝冤少保憶昔景泰年間事隻手扶天助
天討司馬門前鐵騎寒居庸城外欖槍掃誰知
徐門爭奪門南內鐘鳴還大寶碧血淋漓濺西
市青山白骨埋烟草靈旗晝展鼉鼓喧遺殿鬼

我萬花繞山鬼一脚不敢出始信忠魂獨縹緲
我來拜公公豈知孤舟落日西陵道杜鵑叫罷
行人稀銀濤白馬歸華表

宣德窰脂粉箱歌為萊陽姜仲子賦

宣皇垂拱天下寧海晏河清休甲兵宮中雲門
徹天響端冕凝旒俯鳳城君臣翰墨灑日月萬
里山川朝帝京黃門紫禁烟花繞鐵馬銅龍轆
轤曉宸筆曾圖鞬上鷹兼工藻荇添魚鳥小爐
精製金盤固匹紙流光玉膚好御墨甜香絕世
無別紅殿盒雕鏤巧成都宮扇展琉璃景德磁

盆嵌珠寶官歌定汝皆名窰才人捧出盛仙桃
天顏一笑愛美器咨爾司空鎮上饒一餅一盃
勝拱璧瑩白縹青映碧霄禽荒色荒俱有戒別
館離宮無粉黛我觀此箱形象竒玲瓏閣道巒
浮翠問名名曰脂粉箱金溝清泚銀花碎點雪
辰遊五柞宮塗朱夜入雙蛾隊姜郎嗜古多收
藏此箱價重堅金買自從海內風塵昏矢流王
屋妖星孛竒珍半化赤土灰瓌寶全歸黑山帥
殘脂賸粉滿長安斷研零琴市兒賣此箱完好
手未觸獸錦囊包須韞櫝想見當年邛盛時上

陽白髮蒙湯沐水嬉宴罷宴頭鷺六宮同享昇
平福二百餘年時事變舞馬空嘶杜鵑哭野老
何為拜茂陵愁唱霓裳羽衣曲君不見柏梁高
臺承露盤金銅仙人淚如瀉又不見灌嬰將軍
祠上瓦一寸黃金土同價葯房藝圃比清閼玉
軸牙籤鄴侯架秋水一池環草堂松風稷稷披
東牆哀時覽物三歎息請看宣窰脂粉箱

金陵雜感

六朝佳麗晚烟浮擘阮彈箏上酒樓小扇畫鸞
乘霧去輕帆帶雨入江流山中夢冷依弘景湖

畔歌殘倚暮愁吳殿金釵梁院鼓楊花燕子共
悠悠

游弁山資福寺呈霞胤師

一片風篁擁翠微晚鐘初動白雲稀谿邊細草
薰游屐石上秋花點衲衣永夜松聲山鬼嘯諸
天梵唄鉢龍歸趙州茶熟人人醉卧聽空林木
葉飛

由畫溪經三箬至合溪

畫舫隨風入畫溪秋高天闊五峰低綠蘿僧院
孤烟外紅樹人家小閣西箬水長清魚可數篁

山將盡鳥空啼桃源不是無尋處楓葉紛紛路
轉迷

行到水窮雲又生谿橋重叠縠紋平荻蘆風起
飄漁網桑柘影稀聞犬聲樹杪船歸山市散灘
頭砧急夜燈明綠蓑青筍閒來往最喜無人問
姓名

登碧巖

拖條竹杖尋山去坐嘯高寒第一峰正喜野花
開蘚徑遠愁楓葉響霜鐘珠簾噴雪天常雨石
壁排空地有龍只待嬾殘煨芋熟柴門應見白

雲封

南鎮

雄鎮南天典秩宗廟門欹側對爐峰數聲黃鳥
啼修竹十里紅泉帶古松斷澗水枯堆木葉亂
山雲起削芙蓉烟橫黛濕秋空晚曳杖迴帆聽
暮鐘

吼山

忽驚山影過帆前更展江湖極目天僧在別峰
雲縹緲客迷歸路水嬋娟魚穿九曲風燈亂葉
落千尋石磴懸共說此間堪避世不知疏鑿自

何年

題曹娥廟壁

漢安年代越江東江上靈旗映水宮五日屍浮
眞父子千秋血食女英雄船迎鼉鼓波濤綠殿
壓蛟門蠟炬紅一道殘陽催客去野猿沙鴈叫
秋風

登白塔長橋望鑑湖

我來十月鑑湖涼水鳥高飛豆葉黃百里風帆
動哀壑兩江烟樹起斜陽橋通宛轉波如雪人
在虛空鬢有霜廢圃荒林秋色老雲蘿山翠繞

衣裳

秋日郊居

柳岸飛魚沫蓮塘起雀風半牕虛夜壑一榻擁
秋蟲江米傳新稻山花落晚紅逢迎青眼客憔悴
白頭翁葵葉沾清露人歸戍鼓中
秋雪飄黃竹雙扉掩石汀山香迷野燒波影碎
江星蛺蝶衣猶綠鷓鴣盞更青官橋吹玉笛鄉
樹倚銀屏門外潮聲急攜壺坐小舫
陶菊手自種楚蘭人未鉏傾盃愁竹葉入饌喜
江魚巖月窺花簞溪燈點梵書雲衫染棕笠松

塵挂柴車漸與俗人遠漁樵能起予

上巳雨中看花作

棠花開盡又梨花燕子春波蹴尾斜何處繡簾
彈錦瑟美人寒食又天涯

西陵詠古竹枝詞

岳墳玉環

隗家留得岳家墳寒食年年哭墓雲看取玉環

叢九曲橘花如雪灑將軍

公遇害時獄卒隗順夜半負公尸潛瘞九曲叢殉以玉環種雙

橘識其處

慶忌塔鐵棺

誤識要離死不難石潭風雨夜深寒塔邊啼鳥

秋郊哭漁父何時見鐵棺

慶忌為要離所詐順風刺之死葬石潭每風雨盛時則鐵棺浮出

閻妃功德院法堂鼓

竹院閒過綠到眉滿天松梵影參差六陵真骨

知何處留得閻妃一鼓皮

理宗溺閻妃建功德院望青樵採民不堪擾有人書法堂鼓皮以譏之

玉泉箋

玉泉箋紙壓西湖宣祖風流絕代無記得曇超

曾說法池魚五色照浮屠

曇超說法撫掌得泉泉在有石池產五色魚宣德間詔置白紙

局以供上用

麴院官釀

白馬紅羊冷劫灰柳絲如線舞荒臺最憐南渡
風流盡澗草松花埽不開

麴院在九里松旁宋南渡時
取金沙泉水造麴以釀官酒

吳門雜感

搔首紅闌七十橋鬪雞陂下草蕭蕭無端醉擊
雷門鼓潛向花陰哭海潮
茂苑樓臺接五湖蓴絲菱片野雲孤烟波一櫂
鳴夷子閒對西施話沼吳

魏

憲

惟度福建人
選詩持

楊白花

江上春風暖楊白花正開一從飄蕩離枝葉飛

入誰家去不來出門再望無顏色每憶楊花愁
似織憑對春風長寄語吹我楊花還舊處

宿白雲洞同金陵黃文中盱江吳星若
白雲留一宿同聽海潮音漁火空江亂鐘聲隔
院沉烟光浮半榻夜氣結層陰忽唳松間鶴能
清夢裏心

西湖春曉

十里寒塘路烟花一半醒晨鐘催落月宿火亂
稀星歌枕看湖白開窓喜嶼青笙歌方一歇鶯
轉柳洲亭

舟中早發

灘聲催短夢帆逐曉風斜嫩綠初歸柳新紅淺
著花宿烟籠水國殘火乞漁家回首山城裏淒
淒起遠笳

李

實

如石四川遂寧人

雜興

湖山有約又重來散木相逢未易才百丈吳山
分螳埳千年湖水漾樓臺野橋寂寂荒苔合芳
草離離小徑開記取蒹葭蒼莽處扁舟攜伴溯
深洄

卓發之

蓮旬左車浙江仁和籍瑞安人
澠籬集

中元遊三潭同王孝先王去賢賦

不知三塔裏此夜月偏明淺草水同色微雲山
更清孤舟搖綠雪遠語亂春鶯似是烟波外猶
餘歌吹聲

月下江行有懷葉潛之吳遺民潘次魯

諸同社

逝水尋遐契江聲莫向東禽哀孤樹綠帆冷一
燈紅霜葉微于影寒流澹若空朝華非所擬遙
對月明中

遺民詩三
同小遠龍眠道中

寒潮辭遠嶼翠黛尚依空澗藻思春碧汀花想
舊紅亂雲飛若霰墜石集如鴻何處尋投子支
筇問遠公

桃葉渡種花詩

風流千載憶蛾眉小立溪邊知為誰兩岸嬌
羞粉黛一時簾箔盡低垂應憐艷冶沈金屋故
遣幽香映水湄只恐江頭頻錯認雲愁露泣濕
胭脂

同李太虛游牛首

揚帆已自賦歸與偶念名山便駕車避暑以茲
為廣廈遣懷卽此作奇書迅鷹擊物當霜後渴
驥奔泉向雨餘寄語世間諸鈍漢機前彈指莫
踟躕

別蕭伯良宜生

窮愁偏合住他鄉無那閒庭竹影涼酒興到今
渾欲減人生如此亦堪傷山間宿雨春猶睡江
上寒雲夜有香最是客心無可託中流又聽棹
相將

秦淮竹枝詞

楚歌湘曲未須哀遙見燈船趁月開長笛叫雲
簫咽水百千神女弄珠來

吳 騏

日千江南華亭人

塞下曲

固原城郭控西秦久戍今經二十春家在雒陽
城下住經年不見洛陽人

使者乘輅出玉門詔持繒帛賜烏孫為言侍子
今無恙初在京師讀魯論

張養重

虞山柳冠江南山陽人

七里灘

七里灘何長亂石紛紜列四顧眼迷離旋行何
蹙躡直下已復難況迺路轉折怪哉操舟兒雙
手輕提挈風波頃刻定一去同電掣在險只尋
常過險翻嗚咽悠悠對儔侶回指千堆雪

石鐘山逢談長益

石鐘山枕彭蠡口兩鐘對峙山絕陡滙合江湖
在此間蛟螭日向山根走夜深恐懼泊舟人聲
從石出如龍吼我來尋聲到石穴水激坎窞虛
相受洪音細響非一狀大者如屋小盎斗一聲
霹靂起蒼崖怪石崩雲壓我首操舟登岸來者

誰京峴山中一老友他鄉老友邂逅奇攜手登
峰倒尊酒

自困溪歷延平抵建寧雜咏

風吹博望槎白浪滾江沙纜走懸厓險舟穿亂
石斜龍鐘垂澗竹躑躅映山花野泊無人境前
林起暮鴉

不寐數嚴更危厓戍火明聞鶻春淚滴防虎夜
心驚枕落高灘響篷懸密雨聲山川淒絕處魂
斷劍州城

汀州道中

左顧潮陽右贛州新羅高據萬山頭畚耜接地
蟠關隘烽火連天起戍樓日夜鄉心皆北向古
今汀水獨南流可憐滿眼崎嶇路惟有青猿伴
客愁

閩中秋興

海國樓船半寂寥夏門浯嶼莽蕭蕭百年廬舍
埋荒草終日桑田上晚潮開府新聞回彩鷁投
戈早已插金貂莫教諸將誇銅柱東望烽烟未
盡消

出福寧城

歷徧閩南第幾州歲寒風雨出東甌平翻白浪
兼天遠亂攪青山入海流眼底分明羅鴈宕日
邊縹緲見琉球無端百折秦川水空繞茫茫萬
古愁

閩江春暮懷古

金鎖江頭寂寞紅扣舷人倚落花風鶻啼日暮
三山外猿嘯春深萬木中只好無諸成霸業何
堪南宋作行宮翠華轉眼如流水芳草千年恨
不窮

夜抵嚴州

歸舟風起暮蕭蕭黃葉山頭影亂飄五百灘高
雙槳下二千里隔一身遙城樓畫鼓連雲暗江
店殘燈帶雨搖此地虎狼兼盜賊不堪愁夢度
長宵

板子磯

荻港東邊板子磯秋高日見雨霏霏荒城草長
埋金鏃廢壘沙深卧鐵衣山上羣鴉迎客舞江
邊孤鴈背人飛晚來風起波濤闊疑是將軍戰
馬歸

竹枝詞

蘄州竹簟涼于水黃陂葛巾細于紗晚來更挽
高高髻喚買街頭水桂花

贈歌妓芳塵

才名老去歎誰知兩鬢如霜未遇時不意詞場
三十載新詩今付與紅兒

劉道開

非眼四川巴縣人

亂後初至成都

錦城絲管地桑柘綠縱橫露下銅駝泣春歸杜
宇驚相逢無故友獨坐愧餘生却訪支機石殷
勤問舊盟

和費此度雜詩

聞說吾生亦有涯野人微尚在烟霞牆東便是
王君宅谷口原宜鄭子家無事焚香常讀易有
時汲水自烹茶柴門晝掩容誰叩只許風來掃
落花

徐波

元歎江南吳縣人
浪齋新舊詩

涼秋寄林茂之

不知何處別徒憶晤時顏野閣聞初就孤情倘
遂閒浮名秋草沒小夢一舟閒來信非難寄新
寒有客還

送浪泊山人還南屏

草色門前路歸期可奈何久留荒寺冷相與早
梅過細雨貧交去春流人事多重游有我輩亦
未歎蹉跎

宿弁山積善寺同周虛生作

雲峰終不近石路寺門前霜蔓懸瓜重風庭聚
葉圓殘燈連曙鳥衆響入鳴泉愛此清虛夜與
君得晏眠

沈士柱

惕菴江南蕪湖人
土音集

聞有長流之信擬出塞曲

子甫十三齡一女尚襁褓聞我將遠行啼哭徹
昏曉向平畢婚嫁遊岳苦不早驅馳適異邦安
問筋骨老搔首長白顛濯足鴨綠島一覽盡荒
域黃塵吹未了

幼讀古人書穴居慕羲皇壯歲志封侯常欲親
沙場行當投不毛辭我玳瑁牀旃裘習華風重
樓而曲房卧則厚狐貉食則美椒姜鐵甲未半
朝自言骨欲僵男兒習勞苦焉得辭遐荒

生平不射獵麋鹿隨我游入山復不深未聞虎
豹愁今將棄詩書買刀繫馬頭筋力雖不強臂

後矢可抽鴈雉宿高岡狐兔穴深丘將令飛走
驚一洗諸生羞

次韻答嚴仍叔見贈兼示子超諸子

半世牢騷不好名著書兀兀老虞卿陰幽樹欲
思護草晚節餐還許菊英韓愈送窮窮益甚江
淹賦恨恨難平織簾更間垂簾者忠孝多君為
發明

偶欲作詩無題諸公戲以無題命賦遂

作四首

瑤笙錦瑟舊歡場曾占溫柔第一鄉老去頓成

彈指事憂來難覓斷腸方渡尋桃葉應多恨夢
到梨花別有香後閣每噓王處仲英雄何損為
情傷

曾醉旗亭唱白雲詩名傳遍石榴裙香奩集欲
窺韓相繡被歌還擁鄂君久向春風無誤曲未
虛夜月有迴文夷吾吟尚囚江左論誦微詞小
婦聞

落魄江湖又十年一生惟愛杜樊川玉臺咏半
紅箋寫金谷詩多翠袖傳莫付雪兒詞度曲花
同天女笑叅禪美人今向離騷憶讀到更深淚

似泉

依依柳色映章臺
憔悴君平手自裁
燭影漫驚同隋淚
香心將見復燃灰
閒情未玷陶潛節
好色曾讒宋玉才
正氣歌成歌板斷
剛腸莫浪作柔猜

遺民詩卷第四

寶香山人 卓爾堪 子任選輯

錢澄之

原名秉鐙 飲光 江南桐城人 田間集

讀曲歌 為左子直作

笑中出細布匹短幅大闊不中裁
儂衫縫衣與郎著
解一邊調爺孃傳小曲
儂能度郎勿按拍板
幾番教儂誤
解二郎好白晝眠上牀
推不醒旁人錯相疑
只怪就儂寢
解三郎喜出門去
望郎畏人知
暗中布方局
郎自不解期
解四郎性不飲酒
雅好捉鼻吟蓮子
種成藕絲絲有苦心
解五黃蘗當

門生為郎作籬落終日彈七絃聽取苦中樂解六

薄命曲為張萬青載花船作

妾家住金陵姊妹良家子身如金錢花被人作

錢使解一車過秦關去知充後房姬嚙臂謝阿母

低頭事諸姨解二君家庭廣廣多植合歡樹但得

為人憐不恨為人誤解三阿母舍女歸泣涕終夜

語養蠶喂黃蘗腹內絲絲苦解四脫釧要阿母妹

勿別與人諒為人小婦寧有姊情親解五弋人坐

磐石野鴨飛滿塘蒲弓不在手一獲兩鴛鴦解六

郎載阿妹行荔枝得飽食妹勿食荔枝奴嗔他生

在側解七妹宿羅浮旁姊在秦華頂夢中擲梨花

與郎同哭醒解八夢醒促郎歸妹來姊不見幃前

出皓腕念姊臂上釧解九郎採芙蓉花花葉大如

船儂自乘船去郎心空見憐解十

做淵明歸鳥詩四章

翩翩者鳥及暮言歸豈無他樹戀此舊枝延頸

夜鳴其聲孔悲吁既歸矣曷云悲矣

翩翩者羽遠集昆岡百鳥于從以翔以翔衝飈

駭散相失一方邈哉天路中阻且長

我之獨處念我儔侶抗志於霄載扇其羽未雲

焉乘不風曷舉矰弋之施于誰之所
陰陰者木有森其條衆鳥萃止鳴聲交交言求
我友言構我巢敬之信之于焉逍遙

田園雜詩

夙昔慕躬耕所樂山澤居憂患驅我遠常恐此
志虛十年一言歸舊宅已焚如嗟我昆與弟茅
茨倚廢墟徘徊靡所栖還結田中廬結廬雖不
廣牀席容有餘牀上何所有一二古人書熒熒陂
上麥青青畦間蔬日入開我卷日出把我鉏
仲春遘時雨旣雨旋亦晴百草吐生意衆鳥喧

新聲紛紛羣動出各各有其營孰是形骸具而
懷安居情秉耒赴田臯叱牛出柴荆耒耜非素習
用力多不精老農憫我拙解軛爲我耕教以駕
馭法使我牛肯行置酒謝老農願言俟秋成
一春勤稼穡草木荒東園今晨始芟刈逝將除
其根良苗常恐短惡草常苦繁腰斧伐荆棘用
以衛籬藩荆棘傷我手淋漓手中痕手傷不足
道籬弱何以存家人挈酒至滿斟在瓦盆勸我飲
一醉頽然卧前軒前軒無人來春風開我門
雞鳴識夜旦鳥鳴識天時東臯人有聲我起毋

乃遲攬衣出門早且復驅其兒黃犢初教成我
鉏子則犁犁鉏豈不苦衣食道在茲道傍一老
父顰蹙前致辭言兒筋力薄稼穡非所宜詩書
雖不尊猶是祖父遺如何舍素業自甘辛苦為
多謝老父意此意君未知呼兒且飯牛吾去燒

東菑

在昔江村田貧者纔數畝父老能力耕子弟無
游手春秋聚比鄰半為垂白叟泥飲不能歸往
往卧路口自經喪亂來此會散已久今年更作
社四鄰能來否社公猶有神鄰翁亦有後呼兒

牧雞豚命媪釀新酒豈惟祖德存抑使風俗厚
回頭語子孫世世毋相負

今晨放大牛水田調生犢穉子原上呼有客訪
茅屋田烏噪正喧招手去何速念此為誰歟有
馬又有僕舍耕還入門友誼素云篤田潦濕我
衣泥塗霑我足且為解襪襪易我揖讓服故人
持不聽訝我未免俗呼兒出草堂敕廚炊脫粟
我去送牛來今夜留客宿

駕牛東臯上有客問我經我牛依田轉客亦隨
我行請問大易旨此理不易聽乾卦冠潛龍遯

遺民詩四
世去其名奇門稱遁甲迺能役九星祇茲无首
義可農亦可兵八卦周天轉六位以時成時哉
不可背亦豈容將迎朝為輦上客夕為隴上耕
斯義如轉圜指出子應聆顧客且安坐吾牛不
肯停

東園有嘉樹開花照昏曉一為葛藟縈遂使枝
條槁枝條既以盡葛藟縈未了我欲解其纏膠
轄死相抱念此不能除斬斷乃為好斬藤樹亦
傷藤去樹以保今晨心目曠宿穢淨如埽樂哉
嘉樹柯且復惜其老寄言種樹人此物去宜早

晨興理園圃有蟲齧我蔬根株既傷損枝葉還
蕭疎我心不忍殺棄之臨路隅棄已還復出此
豈能盡除況且擾鄰畦彼蔬亦何辜念當護此
生慨焉揮鋏鉏遂令害苗物戮盡無復餘借問
好生人此義將焉如

鄰舍有老叟念我終歲勞日中挈壺榼餉我于
南臯釋耒就草坐斟出盡濁醪老叟自喜飲三
杯興亦豪縱談三國事大罵孫與曹呂蒙尤切
齒恨不揮以刀惜哉諸葛亮六出計猶高身殞
功不就言之氣鬱陶嗟此異代憤叟毋太牢騷

屋上春鳩鳴田家穀始播時雨催我還倚鋤檐
前坐牧童去未歸雨聲聽漸大時雨豈不嘉所
慮老牛餓自往喚牧童牽牛入闌卧我牛旣以
來我鋤行須荷田疇及時治況復雨初過亦知
冒雨寒爲農焉敢惰

盼盼水中蛙螭螭隴上烏土膏一以動各有口
腹需田婦饁我飯承筐置路隅顛顛者誰子似
是久餓夫問之不肯對但指形容枯我腹豈不
枵畏其委溝渠撥飯與之食傾筐無復餘飯已
長跪謝此恩漂母逾我實憫子飢寧爲千金圖

揮之使速去毋用長者誣

春天不久晴衣垢及時澣身上何所著敝襦及
骭短家人念我寒一杯爲斟滿酒滿不可多農
事不可緩奮身田野間襟帶忽以散乃知四體
勤無衣亦自暖君看狐貉溫轉使腰肢嬾

東家事詩書西舍勤稼穡本意在謀生所期各
有得君看西舍翁男耕女能織娶婦旣以勤生
子又得力焉知翁室豐今年大召客割鷄秋極
肥出酒濃如漆可憐東家子終歲不飽食夜愁
兒女啼晝愁租賦逼天寒四壁空相見無顏色

從此誠子孫決志耕不惑

魯國有一士中年不蓄妻有酒惟孤斟有牀祇
獨栖將旦候雞鳴入夜聽烏啼三冬布衾單暖
氣無一絲況復失中饋長苦渴與飢飢渴豈不
苦所得良自知在世多不便去之甘如飴常恐
懷其安一旦不肯離不離可奈何吾其無此迷

上士守其中下士勞其形晝作形以憊夕息神
亦寧放身草間卧一卧不得醒豈惟舒我體亦
以忘吾情春耕思有雨秋獲思有晴終年旱潦
憂常恐秋無成秋成聽諸天而我胡營營我情

豈忘歟庶無他妄生

人生會有盡行止非自由止亦不可趣行亦不
可留如何柴桑叟汲汲爲此憂終年痛飲酒冀
以忘其愁吾身聽物化化及事則休當其未化
時焉能棄所謀有子亦須教有田亦望收天心
與人事何息不周流我不離世間而願與天游
焉能外親戚視之同聚漚乃知黃老書不如孔
與周

雞鳴

冬已過半夜偏長愁人不眠獨在牀寒雞擁翰

不肯叫老鴟得氣山頭嘯山頭有虎伺人行佞鬼
騎虎學雞鳴雞在牆根鼓兩翅欲鳴不鳴時未
至村南村北聞犬喧雞未三唱勿出門牕前山鬼
太無賴低頭樹下學人拜遙遙古寺打鐘聲一聲
一拜聲聲驚雞鳴一聲天下白千狀萬態從此滅

老驢行

老翁住山出無車往來惟乘長耳驢往昔為驢
今為蹇村前村後去不遠遠去十里輒傷蹄有
時天陰陷在泥卽今收放復誰管驢耳雖長尾
漸短夜半槽邊聞驢鳴誰其起者白頭兄可憐

驢老為人棄獨有老兄把火喂老兄喂驢不自
騎與兒騎去嫌驢遲驢歸遲今兄起早牽在雨
中食細草

獲稻詞

女跣碓兒埽倉我家今日稻登場獲稻上場打
稻畢拂還租稻叉手立往時入倉纔輸官今年
只在場上看晚禾乾死田無稟又下官符催馬
草買草納官官不收千堆萬堆城南頭風吹雨
打爛欲盡餓殺闌中子母牛

孤鴈篇

北風吹鴈孤飛遲日暮失羣鳴且悲羽翮顛顛
天涯遠同侶被傷身獨免往時塞上矰繳多如
今江湖遍網羅網羅遍張飛不得茫茫四海難
求食江空歲晚稻梁微水淺魚鰕處處肥漁人
打魚不打鳥汝但飲啄毋驚擾雲中時有征鴻
聲聞之勿起翻飛情勸汝勿羨雲中翼雲中之
禽身不測

捕魚歌

長河水退疾如箭江魚上水只一綫土人關魚
亦擇日織竹為梁罟同密水口有梁魚早驚大

魚小魚湧來爭大魚奮鬣向空擲去江咫尺出
不得鯉魚信是非凡鱗騰空躍過真有神小魚
無神枉自急依倚大魚頭戢戢聽得水響皆回
頭水聲亦是灘上流灘上細流旋已汔諒汝終
是池中物

清晨打魚魚網齊人多水淺水為泥大魚入網
歸漁戶小魚亦聽村人捕風寒如刀人不覺一
半無留空手捉捉得鯉魚已在手手滑旋為他
人有物物有主爭不得此魚非汝口中食崛強
不動灘上鱗灘邊挺叉先有人往來搜括何太

盡寧有細族水中刺水中之魚亦善藏明年出
水三尺長

三一上人雪竹歌

長鬚上人髮盡禿與我共棲江頭屋今晨洗硯
向江流為我開牕寫雪竹竹竿著雪爭低垂拂
檻無聲相亞枝葉上離離雪不動普天凍合無
風吹竹下鬼峨千年石雪光照耀同一白雙眼
迷茫認不清森森冷氣遙相迫上人畫雪果奇
絕淺深遠近能分別揮毫潑墨煙雲流墨不到
處即為雪上人胸無一點塵竹石為骨雪為神

本來無限蕭疎意筆下淋漓寫向人旁觀嘖嘖
皆稱善那知君自呈生面別後攜歸挂草堂與
君千里常相見

孤螢篇

江村六月夜將秋乍有乍無螢火流初出井闌
飛不起漸尋檐戶去還留去留不定隨風度忽
上簾旌脉脉駐弄影疑窺竹裏星含情似少草
間露草間露少光不融却憶當年爛熳叢讀書
共映匡生卷照院同輝隋帝宮祇今寂寞自明
滅耿耿丹衷應有血熠熠何曾借壁光淒涼不

肯因人熱莫笑孤螢燄最微穿簾入幙有光輝
能臨錦軸窺銀字還拂瑤琴見玉徽
牕裏佳人發長歎空房獨有孤螢伴
凝輝不受烈風飄亮節偏於陰雨燦
可憐螢火腐草生自開自閤本無情
夜深燈暗天昏黑猶賴孤螢一點明

燕巢行

燕子飛來繞人屋屋裏檐前看不足
幾回尋得屋可棲却向春田銜新泥
春來雨多泥嫌濕燕子巢成梁上立
傍人相賀燕有巢豈知心為黃口勞
黃口在巢燕飛去時時得食銜來哺
長得

雛成能學飛燕子辭巢何處歸
丁寧向雛如有訴明年記取舊巢處
明年雛燕堂前見人猶認是銜泥
燕舊燕營巢新燕補勿負巢邊燕子語

水夫謠

水夫住在長江邊年年捉送裝兵船上
下水不記數但見船來點夫去十家門
派一夫行生死向前無怨聲衣中何有
苦搜索身無錢使夜當縛遭他鞭撻無
完膚行遲還用刀箭驅掣刀在腰箭在
手人命賤同豕與狗射死紛紛滿路尸
那敢問人死者誰爺孃養汝纔得力送
汝出

門倚門泣腐肉已充烏鳶飢家家猶望水夫歸
乞兒行
乞食兒勿求飽如今惟有乞兒好富人
有糧貧
有丁羨爾不聞追呼聲鄉里小民難到縣羨爾
不見縣官面官家賦稅多如麻汝徒只稅籃中
蛇君不見富家翁朝防吏人夜防賊通宵有眼
合不得籃中蛇去值幾錢草堆一夜鞦韆眠

捉船行

縣裏今年大捉船有船不近長江邊往時繫纜
闌江口如今橫艦截江守峨峨大扁載官齎官

不放行可奈何捉船到官候糧久可憐無糧燒
船走男兒生計亦無窮何苦老在波濤中從今
應與江神別此生誓不理篙楫閒得一夜心不
休明朝替人駕小舟

雞將雛

田家養雞秋不收時時鼓翅土中搜土中何有
時搜得擲向雛前看雛拾蚯蚓啄出雛且驚銜
去故引雛來爭可憐粒粒送黃口背距雛勤咽
得否天寒柵壞雨中伏喔喔呼雛腋下宿蒼鷹
欲下雛亂藏護雛與鬪為鷹傷雛漸長成東西

去母子相遭不相顧母心戀雛逐不休被雛啄
傷始回頭

搏虎行

勸君有山讓虎住慎勿搏虎動虎怒虎欲住山
可奈何搏虎不中傷人多世人但言猛虎虐我
在山中笑人弱夜到官符召獵師獵師寸鐵不
曾持卽期虎穴不日埽縱火乘風殊草草居人
防虎結伴行見虎上山攘臂爭攘臂爭功爲虎
死那知端坐巖穴裏火勢逼虎虎心驚躍出深
林作吼聲獵師辟易火亦滅山頭火光猶未歇

山頭之火隨風吹近處人散遠不知君不見獵
師旣去虎歸穴山前山後新滴血

空倉雀

空倉雀何不只在空倉住朝朝飛上田頭樹田
頭樹多站滿枝東西跳踉偷眼窺禾稽乾死稻
無粒汝縱下田不得食滿地蓬蒿亦生子何不
飛入蓬蒿裏覩我穀種曬場邊食之荒我明年
田穉子持竿滿場逐飛飛又上人家屋屋欲穿
天且雨今年無草何以補官倉自有雀鼠糧何
難飽食充汝腸空倉雀不如但學倉中鼠日竊

官粟誰詈汝

泥鰍行

人家堂坳水不乾疑有怪物水中蟠田蛙無聲
蚯蚓踏爭傳此物頭有角老巫見之禮最恭云
是洞庭行雨龍作法燒符請龍子雷火滿空龍
不起不如蜥蜴徑寸身亂打雪雹猶有神傍人
還恐變化去那知藏在泥深處汲水取泥投江
流蜿蜒乃是泥中鰍泥中鰍何足怪空使老巫
朝夕拜

湖孰種菜歌

金陵城東湖孰村中有隱者開平孫通侯甲第
今已矣意氣豪華無復存開平去今凡幾代五
王之後惟君在往昔爭言青門瓜如今獨數湖
孰菜問誰種菜滿畦新一家生計只三人終歲
把鉏菜畦裏婦能炊飯兒負薪爲君婦亦太辛
苦嬌貴當年難比數翟珈賜出小侯妻珠翠裹
成上公女都人猶記嫁時裝如雲妾媵爛生光
臺前照鏡輪梳髻架上熏衣派管香一朝散去
竟何有相對惟餘雙白首早從府內厭笙歌還
向村中操井臼村中井臼倚柴扉賣菜還愁終

歲飢夜長不肯燃薪坐十指侵寒綻故衣東川
子孫公主裔妻孥行汲心常媿聞說君婦盡傷
情無心更擬求奴婢

胡星卿茅屋歌

白鷺洲接大江濱牧馬兒來動成羣先生避世
何處去合家住近公主墳茅屋三間倚墳脚門
戶欹斜草繩縛籬外時間樵婦喧樹下每有漁
船泊先生田無一石租餬口祇賴青囊書星卿精堪輿術
春深婦子競鉏菜水落弟兄公養魚可憐茅屋
多年破五柳陰中留客坐風雨淹旬不出門先

生高卧舉家餓先生本是公主孫當年駙馬最
承恩馴象門西起府第至今基址宛然存府基
荒去墳園冷細竹寒花空滿嶺洗菜猶傳金水
橋灌畦爭汲琉璃井東川戰功晚始酬駙馬還
蒙少主優靖難師來家已破子孫旋失東川侯
奪爵猶加主國號上書乞恩無不報下降聞在
高帝年問安尚覩英宗詔詔書累朝墨有光龍
箋寶篆枕中藏主家法物一朝盡樸素惟留駙
馬牀駙馬之牀樸如此想見國初俗不侈當時
賜出椒房宮如今鎖在茅屋裏茅屋相看幾度

春終年抱膝不知貧叩門半是先朝爵失路時
憐帝室親先朝帝室復誰在茅屋棲遲人勿怪
君不見開平王後懷遠侯妻子負薪身種菜

樂易堂落成 選二

傍墓三間室還家十載情投閒非避世鍵戶且
偷生身老居宜煖眼昏牕欲明西偏虛斗室住
我白頭兄

清淨同僧舍吾名樂易堂義經爲貝葉神主代
空王粥飯時鳴磬晨昏每炷香琉璃通夕點一
樣佛燈光

田間雜詩 選六

農事吾曾學園林況可栖犢需三社教田過九
天犁雪少春無雨霜濃晴有泥麥苗先後種出
已一時齊

茅茨松竹裏編棘偶爲園水落旋成徑烟孤不
入村老惟能讓事躁未免多言薄俗真難見吾
生合閉門

小港通江路到門祇見山客因迂道少身以背
時閒藥物慵能損酒錢零易還生涯一字訣惟
學子瞻慳

野外閉門早窮冬似不寧夜長鐺火慢天黑壁
燈青兒語嫗能省鼠行狸會聽偶然思小飲已
覆掌中餅

世界窮如此吾徒更可知兒愁催稅吏孫失授
經師飯少煩春細爐寒勸起遲問年纔五十底
事鬢成絲

長夜不能寐多年祇獨栖心全為易耗時復著
詩迷鴟嘯常疑鬼兒啼直准雞放閒無別法惟
有醉如泥

病中述懷

吾志亦殊小天心胡太慳所求竹數箇為構屋
三間雅願頻年縮閒情一病刪竟無安隱處只
合返家山

不寐

客被何曾煖霜嚴好是晴雞寒啼費力鼠黠隨
無聲殘月曉纔上野更遠不清通宵求合眼多
是近天明

梅花詩

卷三

春信眇無緒荒烟空滿林偶然臨水見慙媿徧
山尋也識冰霜意誰窺天地心歲寒同調少惟

許老僧吟

何處花先放向南三兩村未春天似夢徹夜月
無言且喜昏鷗散毋嫌翠羽喧衆芳久寂寞賴
汝照乾坤

離離壓殘雪脉脉照溪濱一任夜無月何妨天
不春芳華憑俗賞風味與誰親祇覺閉門後徘徊似有人

夏日園居雜詩 選三

共羨炎蒸日吾家萬樹中巷涼微有氣午熱轉
因風睡賴看書引吟惟卽景工小船常入市河

路幾時通

總無身外物斗室卽堪容檐鬪新來雀窓吟欲
出逢蠶酒移旋變味茶盡各開封最愛湖心菜兒
童日采供

睡法今年得柴門向午開牽蘿上老樹留棘扈
天梅死友夢中見游僧嶺外來

僧文如言林樹本身後事

漫言

湖海事吾志已成灰

雞冠花

紛敷籬下物爛熳夕陽中長夜應難叫危冠空
自雄已知形似木底事祝需翁對爾驚秋盡寧

輸報曉功

同奏公梅士舍弟食蟹有感

憶昔江村樂持螯意惘然晨甯當開口夜火點
江邊落水纔輸課經霜始論錢弟兄輪作麪此
事十餘年

客初門寓十王寺雜詠

一名悟
法寺

城南悟法寺臺殿敞溪邊俗儉偏貪佛僧賢欲
改禪春喧臨水碓篙曲上灘船頗羨村翁古衣
冠似漢年

經旬不出市草色滿庭荒破院埋雙塔長廊閉

十王香田常住累佛事一秋忙好接諸方衆尋
師坐道場

無事尋人語閒談每夜深土風崇鬼教梵唱雜
伶音諧俗老來態悔遊病後心所嗟詩思澁得
句費沉吟

茶棚閒寓目來往閱行舟日落渡難待灘平纜
早收鳥知施食集魚恃放生浮窳堵溪流隔常
思到上頭

吳城阻風

十首選一

潮落墟初出舟航集市門邊商人盡讓楚客語

多喧曲巷穿山徑巖牆上水痕令公祠開甚新
稅及梨園

葉聲

墜響空階靜辭柯一葉乾無風吹地走不雨打
簾寒已覺埽堪惜還憐踏欲殘掩門深坐聽山
路正漫漫

延平感懷

選二

冠蓋昔全盛經過祇獨嗟府前官下馬山頂吏
開衙遺事刪天寶名流散永嘉暗尋僑寓處錯
認幾人家

起居尋丈裏未晚紙牕昏送客聊諳徑看山只
在門僧寮兵婦雜公解吏人存故老勞相問慚
予少舊恩

永安雜興

既別令移居山寺
候黃朗伯不至

山城何所戀淹忽十旬餘市匱難求米厨貧間
買魚天寒人興短客久主情疎擁戶無相問乘
閒且著書

月夜過沈氏江樓

何處堪乘月沈家樓最明晚來江更大秋到水
初清遠火移時隱孤舟犯夜行市門催客去早

是起更聲

到樅陽

望見樅陽近風帆及早收漫愁舟進口且喜水
回頭市井新開店人家始下樓江流雖勇退勢
比昔年秋

水村卽事示諸從子

近水山都小穿湖路盡通帆低歸浦雨傘敵到
家風門繡蒼苔澁堤號老樹空全家生活計都
在森茫中

檐溜何時住春泥不肯乾子孫如此衆屋宇那

能寬草澤收牛早秧田護鴨難衣棉脫更著早
暮覺全寒

同盧漢遠熊甘澍廖朱草楚山上人遊
龍興岩訪松關曉庭遂至茅蓬

出城無十里一路有泉聲得伴寧辭倦看山不
覺行亭荒樵共歇田小犢深耕莫更思攜酒吾
方困宿醒

江村雜述

選二

老屋江臯近兵船上下愁祇求連夜過怕被鬪
風留烽火沿村放雞豚比戶搜蘆中多難婦莫

勸土人收

自來生計少難後更何營
襖被讓寒女稻梁分
老兄兒知鹽米貴天與利名輕
得飽殊非易明年我欲耕

冬至前一日峽山途中作

且勿憂天變今晨有薄霜
客衰鬚苦凍驢瘦耳
尤長山色凌冬紫雲情欲雪
黃明朝猶在路那得養微陽

龍眠山中雜興

八首選一

亂後山田瘦春陰趁早耕
秧鍼寒裏損糞火雨

中明酒店乘忙蓋鄰家為水爭
叱牛牆外過時有讀書聲

雨宿方望子寓樓

小樓聊假息留滯忽經時
月色愁中誤雨聲醒後知
朝炊烟不出夜漏榻頻移
多少交親宅唯君借一枝

別孫不害途中有懷

出街別孫楚驢背獨成眠
客影瘦殘照人聲喧渡船
魚曾爭開口牛路指墟烟
念爾柴關掩初抄秋水篇

江程雜感 選二

不宿汀洲踰十年水禽烟樹各依然烽臺榜署
新軍府汎地旗更舊戰船估客暮占風脚喜漁
家晝逆浪頭眠江天事事渾如昨回首平生獨
可憐

亂後江城估舶通千檣泊處一村空灘頭客附
漁家火路口神棲破廟風梅福隱來休問姓管
寧歸去已成翁行吟忽有僮僮識猶詫鬚眉與
昔同

還家雜感 選二

此生誰料有還期哭罷相看夢裏疑同產僅餘
三子在一門猶仗兩兄持篋中淚漬遊人信壁
上蝸殘憶弟詩不是天涯歸意嬾嬾歸原怕到
家時

近家纔聽喪吾兄望見柴門百感并得病祇聞
思弟劇遠歸虛擬出村迎哭耶嬌女帷前識繞
膝孤兒別後生素喜拮据遺蹟徧經行何處不

傷情

哭四家
兄若士

石門湖歸

扁舟一宿石門湖返棹沿洄日已晡水落苦愁

河路曲橋崩深念渡船迂沙邊蟹火沿途導澤
畔漁家記姓呼夜半虎行扉不閉酒醒遙見月
輪孤

曉起

露華滿砌月當天鴉鵲林棲各悄然近井婦喧
爭早汲合村人起說難眠漁家欸乃三更艣汎
地依微一隻船本意追涼風總息應攜童穉浴
清川

咏陳園紫牡丹

選一

陳氏園亭溪上斜新晴初放一叢花憑欄力弱

歌朝雨映水姿明鬪晚霞傾國自來非正色為
王早是壓中華却憐蝴蝶紛紛夢猶認春風屬
魏家

暑中走椒嶺省方氏姊示諸甥

十七年前椒嶺路短驢疑在夢中行兵烽幾度
門無徑靈雨初通澗有聲久旱得雨牛屋半楹啼寡
姊蔬盤一夜費貧甥老來萬事心灰盡益重人
間骨月情

夜歸

江上霜風吹客衣菰蒲艇子夜深歸征鴻暗叫

尋行度野鴨齊驚破陣飛近水林巒行去失遠
村燈火望中微犬聲出屋春聲歇知有人開竹
裏扉

田家苦 選三

老夫生計苦疎慵學稼東臯擬自供豈謂歲豐
偏乏食可知穀賤最傷農埽倉不補衙前費減
糶權酬廡下傭為語家人休悵恨晚禾或穀一
冬春

辛苦莊翁已半年自興東作廢朝眠調停力僕
私加酒護惜耕牛少種田烏稻儘完村店債青

苗先抵富家錢獨憐開柵雞初飽縛換官鹽向
市塵

陰晴不定屢妨功辜負人家望歲豐稻已登場
淋驟雨禾纔垂粒損東風欲薪老樹寬炊婦許
製寒衣勸牧童尚有水田難得穫租船索酒費
無窮

金陵卽事 選四

秋山無樹故峻嶒幾度支筇未忍登荒路行愁
逢牧馬舊交老漸變高僧鐘樓自吼南朝寺佛
塔還然半夜燈莫向雨花臺北望寒雲黯澹是

鍾陵

城郭人民迴未移夕陽鼓角不勝悲屋檐幾處
添宮瓦石路何年踐御碑祠廢已無官樹禁寺
荒端為賜田追酒樓徧唱關東調誰聽秦淮舊
竹枝

日落荒祠鴉亂鳴蒼苔道滑少人行為尋鐘梵
趨投寺怕觸車塵戒入城野老善談亡國事山
僧猶唾賊臣名周雷碧血藏何處欲向墳頭哭

一聲

謂周仲馭
雷介公

鍾山依舊有雲封宮監孤忠尚荷容報國獨存

千歲蛻護陵猶守一株松休從廢地占龍氣敢
憶深林見鹿蹤方外小臣曾未到幾回落照哭
秋峰

初夏

喚晴喚雨樹頭鳩處處農忙為麥秋山筍充盤
和露折野花入藥夾藤收學飛燕子空巢出作
隊魚苗戲溜游講罷南華無一事舊詩親寫與
人留

杜鵑

四月秧齊水滿村杜鵑啼處綠陰繁山花似染

三更血國事徒傷萬古魂少婦枕邊春已去征
夫嶺上雨初昏天津處士休愁絕那得南人氣
尚存

五月卽事

柴門新縛豆棚寬來往行人坐此看荷葉值錢
須護早麥仁炊飯覺春難流螢白晝潛瓜蒂水
烏清江乳芡盤時有農夫相問訊分將常膳與
同餐

新杉細竹逐時修牕裏琴聲夜更幽炎月曬來
顏亦黑南風吹久骨皆柔瓦疎入夏遭梅雨糧

盡經旬接麥秋却笑昨宵眠不熟雞雛放出未
親收

峽山

山邊草徑已成蹊野火燒餘碧未齊斷黑上關
防有虎侵星炊飯罕聞雞酒家新占居民少市
井重遷舊址迷人迹較稀車路淺馬蹄不濺尺
深泥

贈徐較書月仙

百褶湘裙映綺筵藕花香處影娟娟風微客乞
鬆羅帶日落人看過畫船卮上口脂和酒送席

邊心事倩眉傳白頭不作鴛鴦夢醉倚紅粧亦
可憐

贈俞缶菴

萍蹤底事滯江鄉半醉開衣指箭創新傍清溪
租藥室許留老衲設繩牀壺中有粒難除癖肘
後何方可愈狂每怪婆心偏爾切原師我佛大

醫王

俞曾為
金山僧

遇曾庭聞蕪陰市上

自著方袍萬恨平窮途遇爾轉傷情我從嶺外
經年至君向江南何處行瓢笠喜無鄉里識鬚

眉猶使故人驚相持莫便當街哭為到郊原一
放聲

雪後僵卧承曾旅菴損錢買炭口占奉

謝

南郊雪後晝無烟市井蕭條歲暮天詩債每催
侵曉起睡鄉長戀看山眠氣噓被濕鬚防凍足
怯牀空膝苦卷正報廚中新炭了故人剛送一
緡錢

登攝山絕頂

峒堯俯視萬峰羅垂老支筇始一過劫火不銷

千佛石烽臺長鑠敗軍河金焦影落天晴見瓜
步帆收晚照多借問宋家麈戰處萋萋洲渚塞
烟波

鳩茲酬張惕中

江頭破衲少知名脫粟親炊見爾情痛入箭創
陰雨夜夢回鞞鼓海潮聲國恩祇覺諸生重交
道誰言亂世輕傳說敬亭僧卧病又衝泥濘去
宣城

白鹿洞中酬周農父

吾徒落落少交親老友逢迎涕笑真虎口並憐

經萬死雞壇剛可剩三人白頭見面休驚瘦赤
脚還鄉賴得貧近喜合明倡絕學謂無可同參莫
負再生身

廬山

匡廬入夢已多時乘興先探絕頂竒一路葉埋
靈運屐合山僧待子瞻詩雲鋪半嶺村猶霽雨
在高峰客不知小豎暗攜長笛至擬登五老向
空吹

貢川道中作

淒涼沙縣半逃亡且喜鄰封畝未荒牛放過溪

休大樹雞鳴有屋在幽篁時平野火耕山砦日
落村烟閉堡牆見說昔年曾叱馭官橋驛路意
難忘

溪回遙識貢川城猶阻危灘半日程牽纜人多
泅水過思家客自刺舟行青山縱伐樵無禁翠
竹延燒火有聲日暮維舟岩際宿一鈞新月向
窓橫

仙掌亭

絕壁孤亭掌上開憑虛斗覺出塵埃荒城日落
炊皆見小艇灘高上不來萬簇米堆峰破碎兩

條帶合水滌洄非緣同伴貧無事誰許遊人晚
未回

灤溪訪江在湄道上卽事

津城雨住遍春泥路過浮橋問灤溪湓浦水添
新漲闊匡廬雲截曉峰齊掉頭帽爲看山側勒
馬韁因戀草低想見江淹詩興勇清篇多在筭
輿題

短橋瘦馬日將斜遙指孤城路不賒麥隴離披
傷雨葉菜田零落隔冬花隄崩迂轡尋荒徑水
涸牽舟礙淺沙一帶炊烟知近縣鼓聲應報晚

陞衙

陵陽雜詩 選一

郭門無地可經行
況值春天不肯晴
一夜水崩橋盡斷
連朝溪漲樹皆橫
欲尋官閣愁闍吏
偶有朋樽礙禁城
賴是遊人多失意
時時買酒與同傾

太湖聶比玉山居

一溪曲折入花源
冒雨衝泥直到門
炊飯無人輪子婦
采薇供客走兒孫
草茅遮斷沿山路
燈火微明隔水村
悲喜半生談不盡
牀頭已罄積

年尊

雜咏 選一

自辭嶺嶠卧江湖
老病驚心歲月徂
萬里瘴烟迷紫極
十年風雨泣蒼梧
星移絕塞流光遠
日挂荒山返照孤
聞說西征元帥府
爭先追逼盡天隅

苦李

月下疑無色
烟中薄有姿
從來不結實
誰賺路旁兒

柳

嫋嫋門前柳絲條拂地垂春風吹有意爲我埽
茅茨

和方有懷孤鴛鴦詩選二

十首詩成盡可憐憐他隻影小牕前也知嶺外
歸來客獨宿松間十七年
此生交頸夢難成媿煞人間伉儷情喚作鴛鴦
單不得時時顧影怕呼名

白鹿坪贈寶惜菴主

烏雲巖下虎聲驕白鹿坪前斷采樵虧煞四山
風雨夜跛師來結小團瓢

腰斧穿雲獨自行空山無伴響丁丁枯株倒向
溪邊爛留待明年木耳生

馬上兒行

河北山東羽檄催紛紛馬匹向南來廬州太守
公然劫一帶城門不敢開

飲僧

佛前日醉兩三場莫笑山僧是酒狂醉裏觀心
無一事看人妄想坐禪牀

病中看花

聽說春光欲起看倩人扶著倚闌干勸花莫恃

精神好也怕風吹雨打殘

馬上看月

露白烟銷欲夜天
冰輪却向馬頭圓
此時見月
惟行客一路人家盡早眠

鏡中看花

分明鏡裏有春風
引手攀花鏡本空
不似月中
丹桂影尚留根在廣寒宮

湯來賀

楊菴江西南豐人

過舊寺次拙菴韻

將霽辨羣峰微雲在孤嶺
蘭若隱其間潭泉心

共冷衆卉含新色頽垣延古影
靈域世情稀懷
抱春日永清澗濯吾足崇岡振吾領
迢遞見匡
廬憇寂觀幽境我心少憧憧茲焉安可靜

懷孔登小卓左車龍文許師六

動息無所營蕭然似孤鶴
貿貿砥頽瀾高卧閉
山閣幽棲疑跼躄曠懷仍廓落
世人無是非吾
心自哀樂深林濯微雨寒泉鳴澗壑洗耳謝浮
名于焉安耕鑿

葛一龍

震甫江南吳縣人

雪夜懷友

雨止雪方受須臾没人脛夜半開門出抱甕汲
冰井四顧何寂寥山空樹無影有懷將語誰破
月上高嶺

送徐巢友還山

吾廬在空山戶牖白雲滿有樹長稷稷餘花亦
纂纂城市不可居晝夜亦何短買藥挂驢背行
歌去人遠日落深澗中洗足春泥暖

子夜舟中聽吳歌

交加樹裏移高岸秋水如空秋夜半客眠已足
酒醒時百轉離腸為誰斷越舟吳女竹枝歌唱

過棚山月不多

新豐曉行

土屋暖堪睡主人燈在門爰循疲馬路漸入遠
雞村山瘠乘霜氣溝深凍月痕隔江兵燹地一
邑幾家存

野橋懷郭聖僕

白版斜飛曲岸通朱欄照見綠波中故人別處
猶堪憶楊柳西邊蓮葉東

胡介 彥遠浙江錢塘人

後感懷

灼灼桃李蹊驄馬日夜嘶襲襲谷中英聞芳不
知名珊珊貴遊子別有性與情目中無國士戶
外空干旌擁篲入丹墀束幣羅前楹意氣橫結
納伐鼓更吹笙吹笙而應簧伐鼓和衆聲安知
爾與我猶自隔平生

贈孫豹人

十年兩見孫焦獲頭鬢蕭騷似飛蓬留得雙瞳
炯炯青終日仰天望寥廓總角盤頭便有名吐
詞屬對座客驚謂當三十取卿相誰令四十無
所成華嶽有家歸不得一身落魄揚州城揚州

自昔稱佳麗捲起珠簾擁高髻鬢篋風吹血滿
城駱駝如山負腰細梅花嶺上葬衣冠丞相英
靈去不還我曹安忍不貧賤朱顏綵筆常饑寒
我年四十七忍耻人間覓衣食汝家三十口日
日市上糴升斗自矜敏捷千首詩換得漂零一
盃酒爲我語焦獲得酒毋勞更作詩李白杜甫
世所嗤

發邗上寄丘四宋大兼傷萬年少之逝

二月下蕪城桃花春水明新楊喧浴馬廢苑寂
啼鶯郊外無軍壘人間賴友生存亡兼契闊悲

喜總傷情

寄龔野遺

一葉落高木草堂秋自生故人已千里明月欲
三更憂患存終古飢寒見老成霜清憐永夜回
首望蕪城

訪陸冰修不遇宿接濟寺明日題壁而
去

鹿門人遠枉招尋還宿谿南祇樹林暫與僧閒
初定夜自傷我負舊來心長河日落魚龍晚古
殿燈昏風雨深雞唱可憐衝曉去參橫月歿一

長吟

建州訓龔芝麓

薄遊戰地歸何晚此日初還南建州雨外孤帆
傷久客月中雙笛憶前遊浮沉雅合金門隱偃
息偏逢鐵甕秋傳得新詩盈瘴海一時風雅盛
曹劉

鳳溪投宿大雲寺贈全菴上人

驚人浪裏放漁船春漲如山欲上天幾陣快風
吹客到桃花古寺一僧眠

過黃梁店題壁

黃梁店口日暉暉白馬祠前客未歸鐵笛長空
人不見太行西去鴈南飛

露筋祠紀事

淮南淮北卧熊羆建燾開藩十萬師
睿策一聲齊捲甲大家回首露筋祠

王貴一

象山槐翁江南化人

觀仲儒烹儒煮茗

濕雲壓牆頭園林綠陰覆熏風破微炎
細雨灑清晝寥寥二三子煮茗挹新溜
撫琴奏流泉讀書思遠岫苟砥高尚懷
蔬水亦何陋泊然無所

營清虛絕囂垢

三閭廟

楚臣不得志寓意在離騷至今汨羅水
無風夜亦號遺廟古堞傍空院盈蓬蒿
我來拜堂下滄浪水滔滔中原昔邁難
衣冠多遁逃睠彼殷憂主豈是懷王曹
歎息復歎息陰雲暗平臯安得夢湘纍
長嘯解鬱陶

感懷

荒洲有鳴鴈哀鳴何磬磬云是失其雄
雌飛獨蕭條嗚呼人不如乃別求其曹

月下

修竹當窓立無風夜亦涼幽居慚管樂高卧夢
羲皇樹老蘿垂地亭虛月到床不辭更漏寂閒
咏步長廊

舊寓留題

久別居停處追思每悵然樹高疑礙日峰遠欲
依天舊客常多病鄰僧才解禪相逢盡一笑溪
鳥自翩翩

李三十六拙隱草堂

別構孤城北茅亭向日開地偏宜種竹天遠當

登臺春柳移陰入殘霞帶雨來年年花事好幽
興獨徘徊

九月六日夜雨作

風雨重陽近寒聲起碧波劇愁千種併慣病一
身多野菊團江舍孤燈暗壁蘿無媒迴素月幽
思復如何

寒雪

暮景同雲集城荒鳥雀喧朔風號萬木急雪打
千村篝火親無燄綈袍擁不温饑寒兼老稚生
意向誰言

元旦小白雪樓試筆

元日登樓望浮雲入眼明賦詩懷白雪開匣見
青萍崛強吾家事逢迎世上情春風漸披豁花
柳正江城

春陰

春半兼旬雨沉陰暗翠微溼雲迷鶴井野水漲
漁磯條柳猶難起疎梅只易飛游情那可愜盡
日掩柴扉

和李平菴連東聞子規

白髮蕭疎老布衣偶來連水訪漁磯天邊杜宇

啼偏苦客舍羈人遠未歸極目河山悲喪亂驚
心草木怨芳菲漢家事業成墟墓莫向韓王廟
裏飛

別真州戴無奇

安道風流久著聞遙傳高義想同羣他鄉表弟
真難遇春雨孤蓬不忍分白白河魚供野饌昏
昏烟柳失殘曛念年曾下江樓榻山色猶橫楚
甸雲

歸鴈

北鴈初歸意渺茫故園在望尚殊方江淮夜火

明空澤關塞風笳奏夕陽何處帛書曾繫足誰
家旅舍動沾裳中原兄弟知多少聽爾應添兩
鬢霜

感懷

高樓一曲奏朱絃雪滿征鴻萬里天自是芰荷
難作服可知榆莢不爲錢望窮遼海歸吟日愁
斷河梁送客年身後一坏須造塔梅花春月伴
長眠

閣雨感懷

蕭蕭秋雨濕金繩宋玉愁懷此倍增落葉似風

聲淅瀝孤燈如霧燄昏騰聞鐘禪定忘爲客入
夜經行久是僧何日衲衣常面壁陰崖一任掛
枯藤

訪吳柴菴南郭

爲憐兄弟經年隔南郭乘舟春水高滿眼風花
迷白髮一罇烟雨對綈袍將無吳市藏梅福祇
有湘潭泣楚騷人世陸沉寧足問相逢劇飲莫
辭勞

三月三十日

亭樹蒼茫綠牆花歷亂紅開罇聊細酌今日對

春風

東湖

輕舟柔櫓過東川湖上風光倍杳然行到中流
最深處玉簫吹徹洞龍眠

無題

睡正甜時却喚回欲留無計強徘徊牛郎枕上
啼紅雨一夜燈花總作灰

送吳甥夢祥入都

古驛風沙送馬蹄川原極目夕陽迷搖鞭莫向
天山去望帝經春滿路啼

沈士尊

天士江南蕪湖人
願菴集

過李白墓

千古高名在青山片碣留牛羊欺宿草樵豎上
荒丘聚族無三戶

祠旁有兩姓
係白壻後

埋詩只一坏平生

讐力士汚足亦何尤

坡公詩平生不識高將
軍手汚吾足乃敢噴

吳茵次招集尺園

三徑蒼涼夕雙鐙爛熳紅麴塵垂檻外桐影落
盃中愛客堅終宴添衣受晚風莫傷巖下電青

眼慰途窮

時先生目
病初愈

春寒同友人夜坐

無端邂逅豈前期燈火熒熒卜夜時野鳥求明
啼盍旦寒花惜別號將離柳眠欲伴人三起樹
繞空留鵲一枝忽憶萼樓長枕被大裘千丈更
相宜

贈張生生

記得西江買棹歸漫天巨浸欵柴扉少微星隱
人高卧鉤黨碑除事已非不向沙場要馬革却
憐燈火戀牛衣卽今土銼塵應滿相顧無勞歎
式微

李

沛

平菴江南興化人

看雲

好友銜杯罷看雲立草堂月升初掩映風起乍
飛揚芒碭占龍氣蒼梧望帝鄉何年凌倒景天
漢共迴翔

甲午立春

十載疑天道荒城又立春雪深埋白骨風急亂
青燐歲儉思循吏陽回歎老人饑寒與衰謝愁
寂楚江濱

遊山子廟

南郭乘春去西郊載酒還遠村俱帶水古廟獨

遺民詩四
三
依山麥秀千畦綠花飛兩岸殷移舟看浣女落
日照紅顏

八月三日過曹菴鑑公采茶夜話

竹徑深堪隱山雲落茗杯露從秋後白香自雨
前來新月明殘照孤筇破淺苔溪花與鷗鳥幽
意共徘徊

人日霧過樊汭

野水孤村合荒林曉霧齊斷橋尋宿舸前路聽
鳴鷄江漢何時淨乾坤此日迷白頭飄短髮俯
仰望朝曦

大明寺第五泉

烽火遙山暗招提識大明尋源應第一憶舊若
前生岡嶺通三蜀輪蹄會兩京閒來看飲馬喪
亂幾時平

聞鴈

槭槭秋風起嘹嘹寒鴈來天時曾不改物候自
相催念爾隨陽去無人自北回海濱矰繳滿聲
斷有餘哀

得家書呈何鐵崖

淮北民無歲淮南水作城他鄉今有麥吾土近

遺民詩四
能耕自歎離家久誰憐作客情白頭何意緒日
日海邊行

九日晚生孫

令節登高酒生孫及此辰負薪他日事襁褓此
時人幾度瞻烏鵲何堪托鳳麟相韓五世後恩
養亦艱辛

雨中過玉山贈鏡上人

支公開社玉山岑乘興扁舟事遠尋兩地烽烟
勞夢寐一秋天氣半晴陰風吹岸柳狂難定浪
卷檣帆去不禁獨有妙高峰頂塔年年孤立大

江心

夢雨

高卧北牕下不覺日停午枕上一片雲飛作千
峰雨

戴

重

敬夫江南和州人
河村集

過豐城侯先墓

豐城侯李彬以靖難功得爵累世皆
嫡絕庶嗣其先墓在含山縣照面山
下荒蕪不修今侯李成祚調附逆黨
獲辟幾失侯登其墓為之太息

照面山窟狼羣嗥磨稜礮水流青蒿黃泥古冢
二尺高百年水皮生蟻螯冢中老翁卧不起曾
將弓馬教孫子燕燕高飛入帝里前驅長矛截
江水功成賜爵萬戶侯金印鐵書紫貂裘一十
二世眷未休千里先墳啼鵲鳩北人莫來驅羊
牛且寧屈却拜賊蝨媚血污刀死不羞噫吁嘻
藤花曉淚濕枯木白鬚老翁來夜哭

采石江觀夜漁

白月照水生白烟漁舟又網風肅然逆波漿破
南山影露濕單衣不裹拳鯉魚尺半壓網起小

兒叫呼阿婆喜老翁搖手教莫喧兵船拏魚只
拏鯉得魚那敢償酒錢避人且換晨炊米西風
驅水如驅牛輕鯈薄魴不可收田則有糧房有
號官家新算棘漁舟

香泉寺

春雨僧同睡江暄客又來黃花陰地菊白首故
人盃泉夜烹明月溝香漾古苔少年遊戲處廢
盡幾池臺

野人堂

自作茅堂山谷裏不種青松種桃李桃李三年

便作花青松百尺吾老矣

歸石白

雞籠出北孤雲客石白湖東近水家到處結巢
同燕子逐年種樹是桃花

涂大酉

次山江西南昌人

雜詩

飛鴻遲遲來掉入青烟路遺音落風中適與歌
聲遇初曲相和鳴終曲託心素幽期竟何如萬
古此朝暮

張彥之

兆侯江南華亭人

秦淮竹枝詞

金甲銀鞍戰士豪六軍承認著功高而今攻守

江南靜百鶴空思賜戰袍

兵尚閱操衣
百雀繡袍

御柳低垂曉色開天壇香繞淨蒼苔陪京國學

當年事紫色燈虛祭酒來

百官燈白
祭酒獨紫

苗君稷

焦冥有邨北直永平人

暮春偶成

遼左春將暮生涯正此時種花開次第馴鶴舞
參差徑轉琴音徹牕虛日影遲寥寥觀世外箕
踞漫吟詩

遺民詩四
立秋前二日懷剩公

坐惜秋將至思君在翠微山空花自落林靜鳥
還飛策杖尋溪水牽蘿挂衲衣涼風送殘暑吾
欲叩禪扉

陸

圻

麗京浙江錢塘人

與歌者陳郎

落日橫江老白蘋同鄉停問一相親未嫌李尉
翻新曲且喜何勘是舊人玉管謾吹秋月白紅
牙曾對綺筵新坐中恐有傷心客莫按伊涼水
調頻

劉養貞

念衡四川大邑人
卽劉孝子

病中雜志

無聊心集百憂中不為依然四壁空
墜下有霜盈短髮腋邊無地納涼風
欠來一字何時補敢向三山覓路通
多少游魂安血污何須留我獨飄蓬

鼎湖龍去霧漫漫千古遺弓血不乾
豈為爛羊充騎尉非緣薄醉誤邯鄲
連昌悲恨惟楊李西夏空驚有范韓
禿頰平生無妄紀臨文肯為故人寬

錢穀

子璧後江江南華亭人

送越僧

纔共遠公遊須臾起別愁挂瓢來浙水飛錫向
邗溝霜落邊鴻急江寒木葉流故山靈隱寺帶
甲幾時休

同韓耕良經正邢孟貞卓火傳陳確齋

渡江

已知作客不勝愁又向寒江問渡頭十里風烟
搖一艇兩拳青翠望中流負雲孤雁和人遠破
浪輕帆帶日收端為性耽山水癖半生落落事

遨遊

胡玉昆

元潤江南江寧人
栗園稿

遊靈谷寺

遊人稅駕始容登五里森森千萬層林外草香
初見鹿礪邊雲至幾疑僧誰來共話齊梁事極
望當年風雨陵無數松濤爭作響護持真藉梵

王燈

祖堂

一領袈裟挂屋西相傳一祖鑿幽棲山留雨露
滋薇蕨寺儼羲皇絕鼓鼙石磴苔深隨礪轉竹

樓門敞與雲齊尋僧欲問禪家事夜半聞鐘月
在溪

